

20. oktober 2015

Uunga siunnersuut: Inuussutissarsiummik ingerlataqarneq pillugu Inatsisartut inatsisaat nr. xx, xx.xx 2015-imeersoq.

(Inuussutissarsiornermut, Suliffeqarnermut Niuernermut Nunanullu Allanut Naalackersuisoq)

Siumumiit aalajangiiffigisassatut siunnersuummut imaattumik oqaaseqaateqassaagut: Aalajangiiffigisassatut siunnersuummi anguniarneqarpoq maleruagassat pisariillisarneqarnissaanik suliniarnissamik, nunatsinnilu najugaqarnissamik piumasqaat atorunnaarsinneqassalluni. Siunnersuummi inatsisassap atuuffia killilerneqarpoq taamaallaat nioqqutissat atugassat tunisarineqarnerinut kisimi atuuttussaalluni.

Siumumiit maluginiarparput inuussutissarsiutitigut nioqqutissat nutaanik pilersitsisinnaanerat kajungernarnerulersinniarneqarluni tunngavilersortoqartoq taamaasilluni nunat tamalaani unammilleqatiginneq ammaanerulersikkumaneqarluni.

Siumumiit arajutsisimangilarput tusarniaanermi akissutigineqartut imarisaat aarlerissutigineqarsinnaasullu, taamatullu naalackersuisoqarfimmiit akissutigineqartut. Aarleqqutigineqartut ilaat tasapput Suliffeqarfinni ilaat akileraarutitigut pisinnaatitaaffisigullu sanioqqutaaralutik ingerlatsisinnaanerat aammaaneqarnissaat. Akissutigineqartuni ersarissarneqarpoq Inuussutissarsiornermut ingerlatsiviit nalunaarsugaanissamut pisussaaffeqareertut.

Inatsisitigut pisariillisaaneq, taamatullu avatanniit aningaasanik nunatsinnut isaatitsinerulernissaq pisariaqartipparput taamatullu atuisartunullu nioqqutissanut akit appasinnerusut iluaqutaasussat pilersinniarneqarmata tamanna Siumumiit pitsaasutut isigaarput.

Taamatut Siumumiit oqaaseqarluta Inuussutissarsiornermut, Suliffeqarnermut, Niuernermullu Ataatsimiititaliamut suliassanngorlugu ingerlatinneqarnissaa inassutigaarput.

Suka K.Frederiksen, Siumut